

19-8

蜀中名勝記卷之二十二

閩中曹學佺能始著


夔州府二

巫山縣

經云江水又東烏飛水注之註云水出天門郡淩中縣界北流逕建平郡沙溪縣南又北流逕巫縣南西北歷山道三百七十里注於江謂之烏飛日本志云烏飛巖在西南四十里與巖相相對宋夔守王十朋詩燕子歸期近君今亦得歸烏飛一枝慙何必高飛自注云隔江有烏飛巖也經云江水又東逕

上海圖書館藏
民國二十一年一月一日

土城文庫
文庫17
W216
8



文庫 17
W216
8



蜀中名勝記卷之二十二

夔州府二

巫山縣

經云江水又東烏飛水注之註云水出天門郡淩中縣界北流逕建平郡沙渠縣南又北流逕巫縣南西北歷山道三百七十里注於江謂之烏飛口本志云烏飛巖在西南四十里與燕子坡相對宋夔守王十朋詩燕子歸期近吾今亦得歸烏棲一枝穩何必更高飛自注云隔江有烏飛崖也 經云江水又東逕

蜀中名勝記 卷之二十二

昭和六年二月一日贈
土岐善唐氏寄

010185186135

巫縣故城南註云縣故楚之巫郡也秦省郡立縣以隸南郡吳孫休分爲建平郡治巫城城緣山爲墉周十二里一百一十步東西北三面皆帶傍深谷南臨大江故謂之夔國也寰宇記云梁武帝廢建平郡而縣存隋加山字縣本夔子熊摯所治今多熊姓西北五十步有陽雲臺高一百二十丈南枕長江楚宋玉賦云遊陽雲之臺望高唐之觀晉孟康註曰言其高出雲之陽也本志云陽臺山下有土主廟其神卽唐張巡將雷萬春縣之跳石人也史載令狐潮益兵圍雍丘巡使郎將雷萬春於城上與潮相問語未絕賊

弩射之面中六矢而不動潮疑其木人使諜問之乃驚遙謂巡曰向見雷將軍方知足下軍令矣 陸游入蜀記云二十四日早抵巫山縣在峽中亦壯縣也隔江南陵山極高大路如綫盤屈至絕頂謂之一百八盤蓋施州正路黃魯直詩云一百八盤攜手上至今歸夢繞羊腸又減字木蘭花調云春水茫茫欲渡南陵更斷腸今有南陵渡矣志云廢南陵縣與陽臺相對晉置劉宋廢基址存 碑目云漢鹽鐵盆記在巫山縣黃太史石刻云余弟嗣直來攝邑事堂下有鹽盆有歎識蓋漢時物也其末曰永平二年又

桓温隸字碑亦在巫山嘉定癸未漕使王觀之併黃太史跋俱徙置漕解王漕又作跋語攷其文爲晉周撫墓碑今不存 入蜀記云日晚遊楚故離宮俗謂之細腰宮有一池亦當時宮中燕遊之地今湮沒略盡矣本志曰楚宮在女觀山西畔小山頂三面皆荒山南望江山奇麗務觀云又有將軍墓東晉人也一碑在墓後跌陷入地碑傾前欲壓字纔半存按此豈卽周益州墓耶 戰國策蔡靈侯飲茹溪流見莊辛臣論溪水流入城外五十步東井志云東井在北城外茹溪俗名小溪也 經云江水又東巫溪水注之

註云溪水道源梁州晉興郡之宣漢縣東又南逕建平郡泰昌縣南又逕北井縣西溪水又南屈逕巫縣東縣之東北三百步有聖泉謂之孔子泉其水飛清潔石穴並高泉下注溪水溪水又南入於大江王梅溪集云縣東半里孔子泉其旁民居童子亦能詩書云巫山亦有泉可飲仍可祈泉旁人幾家聰慧多奇兒 經云江水又逕琵琶峽本志云琵琶峰下女子皆善吹笛嫁時羣女子治具吹笛唱竹枝詞送之梁簡文琵琶峽詩由來歷山川此地獨迴遘百嶺相迂蔽千崖共隱天橫峰時礙水斷岸或通川還瞻已迷

向直去復疑前夕波照孤月山枝斂夜烟此時愁緒
密熒魂逝九遷 入蜀記云二十三夜泊清水洞洞
極深後門自山背出色黠闇水流其中鮮能入者歲
早祈雨頗應權知巫山縣左文林郎冉徽之尉右迪
功郎文庶幾來志云清溪在縣東十里 經云江水
又東逕巫峽註云杜宇所鑿以通江水也郭仲產云
按地理志巫山在縣西南而今縣東有巫山將郡縣
居治無恒故耶三峽七百里中兩岸連山略無關處
重巖疊峰隱天蔽日自非亭午夜分不見曦月至於
夏水襄陵沿沂阻絕王命急宣有時朝發白帝暮到

江陵其間千二百里雖乘奔御風不以疾也春冬之
時則素湍淥潭迴清倒影絕巘多生檉栢懸泉瀑布
飛漱其間清榮峻茂良多趣味每至晴初霜旦林寒
澗肅常有高猿長嘯屬引淒異空谷傳響哀轉久絕
故漁者歌曰巴東三峽巫峽長猿鳴三聲淚沾裳
峽中有十二峰曰望霞翠屏朝雲松巒集仙聚鶴淨
壇上昇起雲栖鳳登龍聖泉其下卽神女廟范成大
吳船錄云下巫山峽三十五里至神女廟廟前尤灘
洶怒十二峰俱在北岸前後映帶不能足其數十二
峰皆有名不甚切事不足錄所謂陽臺高唐觀人云

在來鶴峰上亦未必是神女之事據宋玉賦本以諷襄王後世不察一切以兒女褻之今廟中石刻引壙城記瑤姬西王母之女稱雲華夫人助禹驅神鬼斬石疏波有功見紀今封妙用真人廟額曰凝真觀入蜀記云二十三日過巫山凝真觀謁妙用真人祠真人卽世所謂巫山神女也祠正對巫山峰巒上入霄漢山腳直插江中議者謂太華衡廬皆無此奇然十二峰者不可悉見所見八九峰惟神女峰最稱纖麗奇峭宜爲仙真所託祝史云每八月十五夜月明時有絲竹之音往來峰頂上峰頂上猿皆鳴達旦方漸

止廟後山半有石壇平曠傳云夏禹見神女授符書於此壇上觀十二峰宛如屏障是日天宇晴霽四顧無纖翳惟神女峰上有白雲數片如鸞鶴翔舞徘徊久之不散亦可異也祠舊有烏數百送迎客舟自唐幽州刺史李貽詩已云羣鳥幸昨餘矣近乾道元年忽不至今絕無一鳥不知其故 經云江水歷峽東逕新崩灘註云此山漢和帝永元十三年崩晉太元二年又崩當崩之日水逆流百餘里湧起數十丈今灘上有石或圓如簞或方似屋若此者甚眾皆崩崖所隕致怒湍流故謂之新崩灘且頽巖所餘比之諸

嶺尚爲竦桀吳船錄云自神女廟二十里至東奔灘高浪大渦巨扁掀舞不當一葉或爲渦所使如磨之旋三老挽招竿叫呼力爭乃出渦矣 水經注云新崩灘下十餘里有大巫山非唯三峽所無乃當抗峰岷峨偕嶺衡嶷其翼附羣山並槩青雲更就霄漢辨其優劣耳神血涂所處山海經曰夏后啟之臣曰血涂是司神於巴巴人訟於血涂之所其衣有血者執之是請生居山上郭景純云在丹山西丹山在丹陽屬巴丹山西卽巫山者也又帝女居焉宋玉所謂天帝之季女名曰瑤姬未行而亡封於巫山之臺精魂

爲草實爲靈芝所謂巫山之女高唐之阻旦爲行雲暮爲行雨朝朝暮暮陽臺之下旦早視之果如其言故爲立廟號朝雲焉其間首尾一百六十里謂之巫峽蓋因山爲名也 金石古文云巫山峽頂古篆乃秦時物邑人向萬云尙存集古錄云神女廟唐李吉甫詩一首以貞元十四年刻丘元素一首無刻石年月李貽孫三首會昌五年刻敬騫一首元和五年刻沈幼真書其他皆無書人名氏可摸搨 漢樂府巫山高云巫山高高以大淮水深難以逝我欲東歸害梁不爲我集無高曳水何梁湯湯回回臨水遠望泣

下沾衣遠道之人心思歸謂之何齊王融巫山高云
想像巫山高薄暮陽臺曲煙霞乍舒卷蘅芳自斷續
彼美如可期寤言紛在矚憮然坐相思秋風下庭綠
劉繪云高唐與巫山參差鬱相望灼爍在雲間氛氲
出霞上散雨收夕臺行雲卷晨障出沒不易期嬋娟
似惆悵梁武帝云張樂陽臺歌上謁如寢如興芳晻
曖容光旣豔復還沒復還沒望不來巫山高心徘徊
元帝云巫山高不窮迥出荆門中灘聲下濺石猿鳴
上逐風樹雜山如畫林暗澗疑空無因謝神女一爲
出房櫳簡文帝云巫山七百里巴水三迴曲笛聲下

復高猿啼斷還續梁沈千云陽臺氤氳多異色巫山
高高上無極雲來雲去常不息常不息夢來遊極萬
世度千秋虞羲云南國多奇山荆巫獨靈異雲雨麗
以佳陽臺千里思勿言可再得特美君王意高唐一
斷絕光陰不可遲費昶詩云巫山光欲晚陽臺色依
依彼美巖之曲甯知心是非朝雲觸石起暮雨潤羅
衣願解千金佩請逐大王歸范雲云巫山高不極白
日隱光輝靄靄朝雲去溟溟暮雨歸巖懸獸無跡林
暗鳥驚飛枕席竟誰薦相望空依依王泰云迢遞巫
山竦遠天新霽時樹交涼去遠草合影開遲谷深流

響咽峽近猿聲悲只言雲雨狀自有神仙期陳後主
云巫山巫峽深峭壁聳春林風巖朝蕊落霧嶺晚猿
吟雲來足薦枕雨過非感琴仙姬將夜月度影自浮
沉蕭註云巫山映巫峽高高殊未窮猿聲不解處雨
色詎分空懸巖下桂月深澗響松風別有仙雲起時
向楚王宮隋李孝貞云荆門對巫峽雲夢邇陽臺燎
火如奔電墜石似驚雷天寒秋水急風靜夜猿哀枕
席無由薦朝雲徒去來陵敬云巫岫鬱迢嶢高高人
紫霄白雲間抱石玄猿迥挂條懸崖激巨浪脆葉隕
驚飈別有陽臺處風雨共飄飄唐盧照隣云巫山望

不極望望下朝氛莫辨啼猿樹徒看神女雲驚濤亂
水脈驟雨暗峰文沾裳卽此地况復遠思君劉方平
云楚國巫山秀清猿日夜啼萬重春樹合十二碧峰
齊峽出朝雲下江來暮雨西陽臺歸路直不畏舊家
迷鄭世翼云巫山凌太清岵嶢類削成霏霏暮雨合
靄靄朝雲生危峰入鳥道深谷瀉猿聲別有幽栖客
淹留攀桂情閭立本云君不見巫山高高半天起絕
壁千尋畫相似君不見巫山磕匝翠屏開湘江碧水
遶山來綠樹春嬌明月峽紅花朝覆白雲臺臺上朝
雲無定所此中窈窕神仙女仙女盈盈仙骨飛清谷

出沒有光輝欲暮高唐行雨送今宵定入荆王夢荆
王夢裡愛穠華枕席初開紅帳遮可憐欲曉啼猿處
說道巫山是妾家喬知之云巫山十二峰參差互隱
見潯陽幾千里周覽忽已遍想像神女姿摘芳共珍
薦楚雲何透迤紅樹日葱蒨楚雲沒湘源紅樹斷荆
門郢路不可見况復夜聞猿沈佺期云巫山峰十二
合沓隱昭回俯眺琵琶峽平看雲雨臺古槎天外倚
瀑水日邊來何忍啼猿夜荆王枕席開張九齡云巫
山與天近煙景常青熒此中楚王夢夢得神女靈神
女去已久白雲空冥冥山有巴猿嘯哀音不可聽李

白云江行幾千里海月十五圓始經瞿塘峽遂陟巫
山巔巫山高不窮巴國盡所歷日邊攀垂蘿霞外倚
穹石飛步凌絕頂極目無纖煙卻顧失丹壑仰觀臨
青天青天若可捫銀漢去安在望雲知蒼梧記水辨
瀛海周遊孤光晚歷覽幽意多積雪照空谷悲風鳴
森柯歸途行欲曛佳氣上未歇江寒早啼猿松暝已
吐月月色何悠悠清猿響啾啾辭山不忍聽揮策還
孤舟李端云巫山十二峰皆在碧虛中迴合雲藏日
霏微雨帶風猿聲寒過澗樹色暮連空愁向高唐去
清秋見楚宮張循之云巫山高不極合沓狀奇新暗

谷疑風雨幽崖若鬼神月明三峽曙潮滿二江春爲
問陽臺客應知入夢人李沆云沒天心開地脈浮動
凌霄拂藍碧襄王端眸望不及似睹瑤姬長嘆息巫
妝不治獨西望暗泣紅蕉抱雲帳君王妒妾夢荆宮
虛把金泥印仙掌江濤迅激如相助十二猶龍怒行
雨崑崙漫有通天路九峰正在天低處李賀云巫山
叢碧高插天巴江翻瀾神曳烟楚魂尋夢風颺然晚
風飛雨生苔錢瑤姬一去一千年丁香筇竹啼老猿
古祠近月蟾桂寒椒花墜紅溼雲間盧象云高唐幾
百里雲樹接陽臺晚見江山霽宵聞風雨來雷從三

峽起天向數峰開靈境信難見輕舟那可迴皇甫冉
云巫峽見巴東迢迢出半空雲藏神女館雨到楚王
宮朝暮泉聲落寒暄樹色同清猿不可聽偏在九秋
中戴叔倫云巫山峨峨高插天危峰十二凌紫煙瞿
塘嘈嘈急如弦洄波波逆將覆船雲梯豈可進百丈
那能牽陸行巉巖水不前灑淚向流水淚歸東海邊
含愁對明月明月空自圓故鄉回首思綿綿側身天
地心茫然孟郊云巴江上峽重復重陽臺碧削十二
峰荆王獵時逢暮雨夜臥高丘夢神女輕紅流煙濕
艷姿行雲飛去明星稀目極魂斷望不見猿啼三聲

淚滴衣陳陶云玉峯翠聳十二枝金母和雲賜瑤姬
花宮磊砢楚宮外列仙八面星斗垂秀色無雙怨三
峽春風幾夢襄王獵青鸞不在懶吹簫斑竹題詩寄
江妾飄飄散絲巴子天苔裳玉轡紅霞幡歸時白帝
掩青瑣瓊枝草草迷湘煙羅隱云下壓重泉上千仞
香雲結夢西風緊縱有精靈得往來猶輓鼉軒亦顛
隕嵐光嶮嶮雷隱隱愁爲衣裳恨爲鬢暮灑朝行何
所之江邊日月情無盡珠零冷露丹墮楓細腰長臉
愁滿宮人生對面猶異同況在千巖萬壑中宋蘇軾
云瞿塘迤邐盡巫峽崢嶸起連峰稍可怪石色變蒼

翠天工運神巧漸欲作奇偉塊軋勢方深結構意未
遂旁觀不暇瞬步步造幽邃蒼崖忽相逼絕壁凜可
悸仰觀八九頂俊爽凌灝氣晃蕩天宇高崩騰江水
沸孤超兀不讓直拔勇無畏攀緣見神宇憩坐就石
位巉巖隔江波一一問廟吏遙觀神女容綽約誠有
以俯首見斜鬟拖霞弄修帔人心隨物變遠覺含深
意野老笑吾旁少年嘗屢至去隨猿獠上反以繩索
試石筍倚孤峯突兀殊不類世人喜神怪論說驚幼
稚楚賦亦虛傳神女安有是次問掃壇竹云此今尚
爾枝葉紛下垂婆娑綠鳳尾風來自偃仰若爲神女

使絕頂有三碑詰曲古篆字老人那解讀偶見不能
記窮探到峯背探斫黃楊子黃楊生石上堅瘦紋如
綺貪心去不顧澗谷千尋縋山高狼虎絕深入坦無
忌洪濛草樹密葱蒨雲霞膩石竇有洪泉甘滑如流
髓終朝自盥漱冷冽清心胃浣衣挂樹梢磨斧就石
鼻徘徊雲日晚歸意念城市不到今十年衰老筋力
憊當時伐殘木牙蘖已如臂忽聞老人說終日爲嘆
喟神仙固有之難在忘勢利貧賤爾何愛棄去如脫
屣嗟爾若無還絕糧應不死王安石云巫山高十二
峰上有往來飄忽之猿狖下有出沒瀟灑之蛟龍中

有倚薄縹緲之神宮神人處子冰雪容呼風吸露虛
無中千歲寂寞無人逢邂逅乃與襄王通丹巖碧嶂
深重重白月如日明房櫳象牀玉肌金芙蓉陽臺美
人多楚語只有纖腰能楚舞爭吹鳳管鳴鼉鼓那知
襄王夢裡事但見朝朝暮暮長雲雨范成大云濕雲
不收烟雨霏峽船作灘捎廟磯杜鵑無聲猿叫斷惟
有飢鴉迎客飛西真功高佐禹跡斧鑿鱗皴倚天壁
上有瑤簪十二尖下有黃湍三百尺蔓花蚪木風烟
昏蘚珮翠帷香火寒靈旂飄忽定何計時有行人開
廟門楚客詞章元是諷紛紛餘子空嘲弄玉色頰顏

不可干人間錯說高唐夢 唐王無競巫山神女廟
詩神女向高唐巫山下夕陽徘徊作雲雨婉變逐荆
王電影江前落雷聲峽外長霽雲無處所臺館晚蒼
蒼劉希夔云巫山幽隱地神女艷陽年襄王伺容色
落日望悠然歸來高唐夜金釭焰青煙頽想臥瑤席
夢魂何翩翩搖落殊未已榮華倏徂遷愁思瀟湘浦
悲涼雲夢田猿啼秋風夜鴈飛明月天巴歌不可聽
聽此淚潺湲張九齡云庭樹日衰颯風霜未云已駕
言遣夏思乘興求相似楚國茲故都蘭臺有餘址傳
聞襄王世仍立巫山祀方此全盛時豈無嬋娟子色荒神

至女魂蕩宮觀啟蔓草今如積朝雲爲誰起崔塗云雙
黛儼如嘖應傷故國春江山非舊主雲雨是前身夢
覺傳詞客靈猶福楚人不知千載後何處又爲神温
庭筠云黯黯閉宮殿森森蔭薜蘿曉峯眉上色春水
臉前波古樹芳菲盡扁舟離恨多一叢斑竹夜環珮
響如何張子容云巫嶺岩嶢天際重佳期宿昔願相
從朝雲暮雨連天暗神女知來第幾峯李羣玉云寂
寞高唐別楚君玉人天上逐行雲停舟十二峯巒下
幽佩仙香半夜聞又云廟閉春山曉月光波聲四合
樹蒼蒼自從一別襄王夢雲雨空飛巫峽長王周云

廟前溪水流潺潺廟中修竹聲珊珊襄王一夢杳難
問晚晴天氣歸雲閑李商隱云巫峽迢迢舊楚宮至
今雲雨暗丹楓浮生盡戀人間樂只有襄王憶夢中
又云非關宋玉有微詞自是襄王夢覺遲一自高唐
賦成後楚天雲雨盡堪疑胡曾云楚國城池颯已空
陽臺雲雨過無蹤何人更有襄王夢寂寂巫山十二
重劉禹錫云巫山十二鬱蒼蒼片石亭亭號女郎曉
霧乍開疑卷幔山花欲謝似殘粧星河好夜聞清珮
雲雨歸時帶異香何事神仙九天上人間來就楚襄
王曹松云巫山蒼翠夾通津下有仙宮楚女真不逐

綠雲歸碧落卻爲暮雨撲行人年年舊事音容在日
日誰家夢想頻應是荆王留不住至今猶得覩芳塵
劉滄云十二峰嵐挂夕暉廟門深閉霧烟微天高木
落楚人思山迥月殘神女歸觸石晴雲凝翠鬢渡江
寒雨濕羅衣嬋娟似恨襄王夢猿叫斷巖秋蘚稀韋
莊云亂猿啼處訪高唐路入烟霞草木香山色未能
忘宋玉水聲猶似哭襄王朝朝暮暮陽臺下爲雨爲
雲楚國亡惆悵廟前無恨柳春來空鬪畫眉長宋蘇
軾云大江從西來上有千仞山江山自環擁恢詭富
神姦深淵鼉鼉橫巨壑蛇龍頑旌陽斬長蛟雷雨移

蒼灣蜀守降老蹇至今帶連環縱橫若無主蕩逸侵
人寰上帝降瑤姬來處荆巫間神容豈在猛玉座幽
且閒飄簫駕風馭弭節朝天關倏忽巡四方不知道
里艱古粧具法服邃殿羅烟鬟百神自奔走雜沓來
趨班雲興靈怪聚雲散鬼神還茫茫夜潭靜皎皎秋
月彎還應搖玉珮來聽水潺潺蘇轍云山中廟堂古
神女楚巫婆娑奏歌舞空山日落悲風吹舉手睢盱
道神語神仙潔清非世人瓦盃傾醪薦麋脯子知神
君竟何自西方真人古王母飄然乘風遊九州揭渡
西海薄中土白雲爲車駕蒼虬驂乘湘君慮妃御天

孫織綃素非素衣裳飄飄薄烟霧泊然冲虛自無營
朝飧屑玉嚙瓊乳下視人世安可據超江乘山去無
所巫山之下江流清偶然愛之不能去湍岸激作聲
喧飀白花翻翻龍正怒堯使大禹道九川石隕山墜
幾折股山前恐懼久無措稽首山下苦求助丹書玉
笈世莫窺指示文字相爾汝擘山洩江幸無苦庚辰
虞余實相禹功成事定世莫知空山俄頃千萬古廟
中擊鼓吹長簫採蘭爲殮蕙爲肴玉缶薦菱香飄蕭
龍勺取酒注白茅神來享之風飄飄荒山長江何所
有豈有瓊玉薦沈寥神君聰明無我責爲我驅獸攘

龍蛟乘船入楚泝巴蜀瀆漩深惡秋水高歸來無恙
無以報山上麥熟可作醪神君尊貴豈待我再拜長
跪神所勞范成大云凝真宮前十二峰兩峰娟妙翠
插空餘峰競秀尙多有白壁蒼厓無數重秋江漱石
半山腹倚天削鐵荒行蹤造化鍾奇矗瑤巘真靈擇
勝深珠宮朝雲未罷暮雲起陰晴竟日長冥濛瑤姬
作意送歸客一夜收潦仍回風仰看館御飛檝過回
首已在虛無中惟餘烏鴉作使者迎船送船西復東
吳宗旦云長江出蜀初入荆巫山十二開翠屏雲華
夫人王母女東朝海若窺滄溟金銀宮闕照水府瓊

壁璫楹侔帝庭江靈河伯隨班立龍女仙娥傍輦迎
眼看日御出暘谷身乘氣躋返金城玉樓一似巫峰
起飈輪畧爲巫峰停鴻濤沃天帝憂顧重瞳殛鯀禹
嗣興悲風撼石從空落落蒼崖自裂無人擎水工叫嘯
愁白日孤臣涕泣哀空岑兩山攢束一遇聖心驚目
駭遙乞靈傳呼侍女詔侍從指授神策驅神兵黃魔
披髮導狂翳童律掉舌同虞庚朝雲暮雨滿空碧飛
鶴游龍翔太清卻疑魍魎逞妖怪披文寶鼎防依憑
律前面對鬼神問禹乃悟見虛空形昔師三元授素
書今領玄教居玉瑛實號雲華上宮主亦是四華少

陰精在人爲人人莫識在物爲物物莫名了知真僊
次於聖力披惘歛祈扣扇樓臺縹緲疊雲上觀闕崑
崑飛瑤瓊抱關師子虬綵髮啟途天馬垂朱纓靈官
仙童澹容與毒龍猛獸光晶熒瑤臺燕坐凝玉質龍
袞拂地傳真經汝功汝能幸及物曰希曰夔猶未聆
欲超大海颺爲馭欲度飛沙雲作駟沙高無駟路將
絕海闊無馭空難騰寶書吾來自寥廓伏讀汝可叱
幽冥出入水火縛虎豹倒插星呼六丁回眸笑指
丹玉笈素手捧出容華綾水行乘舟出乘櫟巨石自
擘川自平龍蟠蛇結除毒螫果穿穴堦蘇黎蒸山形

半破餘斧迹鬼工嶄鑿非人程元圭帝餘彰水德真
人號位居紫庭重瞳薦天付大寶上曰若帝仍百齡
藤蘿歲長蔭古廟梅梁晝飛糜鐵繩峽祠萬里跨江
漢血食千秋如弟兄遂封真人行極妙遠配夏后功
相仍云何肯入楚王夢作賦翻令宋玉矜廣寒弄妃
月色瑩藐姑處子雪肌輕月闕嬋娟窺繡戶雪呈體
態入疏櫺身行天上渺無迹夢到人間容有情前賢
撫實言語妙今我復以歌詩鳴晴嵐空翠不改色迴
流瀄水長相縈剪刀剪雲向空住掃竹掃葉隨風零
仙人峩冠上玉砌仙女舉帔搖金鈴眾峯翼張浮翠

葆國手圖畫傳丹青數從黃冠拜行殿甫遂祝史祠
郊垞當堦文石白珞珞入門青蓋高亭亭元臣授策
功照耀小儒學道心精誠願聞秘訣換凡骨逕參律
輩騎長鯨唐耜云楚澤隱巫山翠壁開鴻濛萬流束
長峽怒浪日簸春朝暉澹高唐巖阿閼彤宮罽愚散
烟霧榮光繞長虹恭聞雲華君少陰體冲融受道紫
清闕飛化凌三空徜徉江海上千騎馳蒼龍羽節回
天津央央弭層峰悽惻下土人昏墊無所容寶書授
神禹百靈倏奔從蛟螭委鞭策山川奠西東九州免
爲魚遂成萬世功嗟余晚聞道蓬心蔽倥侗維舟垂

崖邊再拜望遺蹤嶙峋山頭石雲衣尙溶溶縹緲玉
瑛臺如在指顧中童律不可問至言誰擊蒙仰首天
壇下松檜回悲風宋德之云靈均媒處如喻意非法
語粵若古高辛先禽委娥女兩美冀必合參差會成
阻女生願有家仕士期致主德協斯服從禮失那得
取弟子頗自異昔契今齟齬依然慳讒嫉正爾因狎
侮邈探姑射機轉弄離騷杼冥心古先后矯志雲外
侶上述懷世知潔身幸親附中言天淵巨廣遠萬物
祖矧茲德不逮開聖足自輔進犧來羨門禱室界公
聚太一禮旣接神人儻相遇卒之志莫原頽怒辭稱

遽顛倒失所依闇暝不知處忠賢代所昧妙麗眾目
覩微辭孱王惑說夢癡人誤高真秉元化昏墊閔下
土平成啟文命臨降枉飛馭在楚俗則然借秦良自
喻陳思懷抑鬱敏識殆天付感此致意深濟洛獨擬
賦慮如洎重出鏤枕猶妄語騷詞信非經傳者無寡
趣真游結習盡體道棲純素亟除魔魅想毋重龍鬼
怒共罄拯民心塗人可爲禹范子長云峽山多奇峰
擢秀推二六雲容矗天宇岡脈蟠地軸晨暎照粉黛
宿雨留膏沐岷江寄徑來一帶幾縈曲巖隈着叢祠
瑤席蔭嘉木古初奉帝命福地任司牧疏鑿佐夏后

鬼神受要束洪流建滄海明德被全蜀陋哉兒女見
幽獨在空谷甚者雕蟲人綺語誑流俗女媧補天手
相望繼高躅難以形色求矧乃夢寐瀆九章述明祀
千載起祇肅若爲女奇事天問綴篇牘靈均尙好奇
何怪門人玉杖藜歛祠宮采芹薦清馥裴章固無取
聊以諗巫祝何麒云舟師告我巫山下不見圖經聞
古語廟嘶白馬舞黔烏壁掛朱猿穴蒼鼠可憐巫子
分毛鬣豈有神仙飽葷茹我然沈水薦寒泉作送迎
章沐雲雨又云玉虬旖旎懷全楚羽帳淋漓笑神女
去去來來刺史詩朝朝暮暮高唐雨塵埋蘚漬壙成

錄斷石斑爛讀空廡肅然生敬攝邪心云是瑤姬曾
佐禹冉居常云朝雲夕雨自虛無玉笈親傳昏墊初
夏后已通三峽水巴人誰省九天書烟巒杳杳藏旌
仗江月沈沈想佩裾千古文章愁宋玉可無一字及
其魚 吳世延十二峰詩望霞峰云披圖占勝謁雲
華初見靈峰冠綵霞拂拭塵容開眼膜舟人指點到
仙家翠屏峰云四合藤蘿羽葆垂遠烟蒙覆畫屏圍
青冥向上凝神望似叩天關第二扉朝雲峰云清晨
縹緲結層陰掩映眞靈洞府深不是名書丹玉笈上
清宮闕若相尋松巒峯云無名草木易凋零獨立盤

雲偃蓋青任是雪霜深蔽翳也應根柢有精靈集仙
峰云左鄰白帝右紅崖中有瑤池阿母家笑飲蟠桃
丹樹下一杯時與醉流霞聚鶴峰云方憐病羽困樊
籠仰見胎禽唳遠空明月不知緱嶺夜一聲聲入白
雲中淨壇峰云巍巍盤石拔天成拂拂修篁助潔清
一息齋宮渾不寐九霄聞徹步虛聲上昇峰云蓬萊
方丈闊滄溟高揖松喬此得朋白日青天殊不遠瑤
臺玉闕一層層起雲峰云油然膚寸起叢霄變化須
臾雨次寥舒卷無心神莫測去來誰謂帝鄉遙棲鳳
峰云碧梧修竹翠微間刷羽朝陽不可攀寄跡雲林

飛有處會巢阿閣邇天顏登龍峰云三分泉下九淵
深直上青螺碧玉林怪得風雲長庇護有時飛作旱
天霖聖泉峰云白厓一注瀉青雲練帶縈迴玉溜奔
酖毒宴安人不覺誰知此物養靈根袁說友巫山十
二峰云平生磊塊山林姿一丘一壑貪成癡寸峰拳
石瞥眼過張皇攫覓惟憂遲東南佳山多秀麗就中
所欠雄與奇飽聞巫山冠巴峽奇峰十二相參差昔
年圖畫嘗一見欲見此山無路之扁舟西沂上三峽
千巖萬壑爭追隨終朝應接已不暇心目洞駭俱忘
疲驀然鉦鼓高唐上峰巒二六排旌旗一峯霞綵烟

在望一峰展翠開屏帷無心出岫雲吐色偃蓋平巒
松並枝僊蹤鶴駕羽衣近壇石瑤臺闔闔低白雲一
起鳳凰下清泉四合蛟龍嬉羣峰角立變態異一一
大巧乾坤爲外堪擊拊試聲律中含造化分四時天
下名山亦多矣未有列岫奇如茲閻伯敏十二峰詩
望霞峰云東皇君來流曉霞暮看西北王母家雲華
夫人王母女肯爲廟食留三巴翠屏峰云秋山黃落
春山青不識仙家雲錦屏六銖天衣下拂石香風馥
郁朝眞亭朝雲峰云山頭行雲自朝朝陽臺暮色連
雲霄朝來暮去變雲雨送老行客無回橈松巒峰云

舟船搖搖大巫前松間絲蘿望纏綿屏風角轉匝
背心在山頭人倚船集仙峯云綠篔簹鞋繫青行纏束
薪温火開山田雲間仰聽仙佩響蓬鬢拂掠燒畚烟
聚鶴峰云望夫石女春復秋巴歌楚舞隨遨頭夜深
九臯清唳響仙禽亦替離人愁淨壇峯云山頭枝枝
竹掃壇舟子竹枝歌上灘炷香上廟擲杯玦但乞如
願舟平安上昇峯云黃麾白馬功告成雲華夫人朝
玉京禹王夏后引音節高低峽船搖櫓聲起雲峰云
釵頭嫋娜山花枝裙尾舊纈山麻衣朝隨雲起采薪
去暮趨女伴穿雲歸棲鳳峰云山頭鳳鳴求其凰山

前家家背竹筐竹花結實未忍食刀耕火種五里香
登龍峰云散而成章合爲龍回風混合游鴻濛舟人
上下神女供俗粧鉛粉臙脂紅聖泉峰云靈源一派
瑤池分灑落掉石隨東奔楚人但愛香溪水溪邊爲
有昭君村元趙孟頫十二峰詞疊嶂千重碧長江一
帶清瑤臺霞冷月朧明歌枕若爲情雲過船窗曉星
移宿霧晴古今離恨撥難平惆悵峽猿聲右淨壇峰
片月生危岫殘霞拂翠桐登龍峰下楚王宮千古感
遺蹤柳色眉邊綠花明臉上紅欲尋靈跡阻江風離
思杳無窮右登龍峰松鶴堆嵐靄陽臺枕水湄風清

月冷好花時惆悵阻佳期別夢遊蝴蝶離歌怨竹枝
悠悠往事不勝悲春恨入雙眉右松鶴峰雲裏高唐
觀江邊楚客舟上昇峰月照妝樓離思兩悠悠雲雨
千重阻長江一帶秋歌聲頻唱引離愁光景恨如流
右上昇峰絕頂朝雲散寒江暮雨頻楚王宮殿已成
塵過客轉傷神月是巫娥伴花爲宋玉隣一聽歌調
一含嘔哀怨竹枝春右朝雲峰雨過蘋汀遠雲深水
國遙渡頭齊舉木蘭橈織殺楚宮腰映水勻紅臉偎
花整翠翹行人倚棹正無聊一望一魂銷右集仙峰
碧水鴛鴦浴平沙荳蔻紅望霞峰翠一重重帆卸落

花風澹薄雲籠月霏微雨灑蓬孤舟晚泊浪聲中無
處問音容右望霞峰芍藥虛投贈丁香漫結愁鳳棲
鸞去兩悠悠新恨怯逢秋山色驚心碧江聲入夢流
何時絃管簇歸舟蘭棹泊沙頭右棲鳳峰碧水澄青
黛危峰聳翠屏竹枝歌怨月三更別是斷腸聲烟外
黃牛峽雲邊白帝城扁舟清夜泊蘋汀倚棹不勝情
右翠屏峰鶴信三山遠羅裙片水深高唐春夢香難
尋惆悵至如今十二峰前月三千里外心紅牋錦字
信沈沈腸斷舊香衾右聚鶴峰曉色飄紅豆平沙枕
碧流泉聲雲影弄新秋觸處是離愁臉淚橫波淡眉

攢片月收佳人無笑準難休來整玉搔頭右聖泉峰
婁娜江邊柳飄飄嶺上雲卸帆迴棹楚江濱歸信夜
來聞欲拂珊瑚枕先熏翡翠裙江頭含笑去迎君鸞
鳳畫成羣右起雲峰 隋崔仲方夜宿巫山詩荆門
秋水急巫峽斷雲輕若爲教月夜長短聽猿聲楊炯
過巫峽詩三峽七百里唯言巫峽長重巖宵不極疊
嶂凌蒼蒼絕壁橫天險莓苔爛錦章入夜分明見無
風波浪狂又云忠信吾所蹈泛舟亦何傷可以涉砥
柱可以浮呂梁美人今何在靈芝徒有芳山空夜猿
嘯征客淚沾裳沈佺期十三四時嘗過巫峽他日偶

然有思作小度巫山峽荆南春欲分使君灘上草神
女廟前雲樹悉江中見猿多天外聞別來如夢裏一
想一氛氲崔灑寄盧八象云客從巴水渡傳爾沂行
舟是日風波霽高唐雨半收青山滿蜀道綠水向荆
州不作書相問誰能慰別愁李白宿巫山下云昨夜
巫山下猿聲夢裏長桃花飛綠水三月下瞿塘雨色
風吹去南行拂楚王高丘懷宋玉訪古一霑裳岑參
下峽舟懷終南舊居云杉冷曉猿悲楚客心欲絕孤
舟巴山雨萬里陽臺月水宿已淹待蘆花白如雪顏
容老難頰把鏡悲鬢髮早年好金丹方士傳口訣敝

廬終南下久與真侶別道書誰更開藥竈烟遂滅頃
來厭塵網安得有仙骨巖壑歸去來公卿是何物皎
然宿巴峽云江聲五千里瀉碧急於絃不覺日又夜
爭教人少年一汀巫峽月兩岸子規天山影似相伴
濃遮到曉船李頻過巫峽云擁棹向驚湍巫峰直上
看削成從水底峻極出雲端暮雨晴時少啼猿渴下
難一聞神女去風竹掃空壇崔塗巫山旅別云五千
里外三年客十二峰前一望秋無限別魂歸不得夕
陽西下水東流盧綸巫山竹枝云十二峰頭月欲低
空船灘上子規啼孤舟一夜東歸客泣向春風憶建

谿徐凝荆巫夢思云楚水白波風嫋嫋荆門暮色雨
瀟瀟相思合眼夢何處十二峰高巴字遙陸龜蒙過
巫峽云巫峽七百里巫山十二重年年自雲雨環珮
竟誰逢蘇軾出峽云入峽喜巉巖出峽愛平曠吾心
淡無累遇境卽安暢東西經千里勝處頗屢訪幽尋
遠無厭高絕每先上前詩尙遺略不錄久恐忘憶從
巫廟回中路寒泉漲汲歸真可愛翠碧光滿盞忽驚
巫峽尾巖腹有穿壙仰見天蒼蒼石室開南嚮宣尼
古廟宇叢木作幃帳鐵楯橫半空俯瞰不計丈古人
誰架構下有不測浪石竇見天因瓦棺悲古葬新灘

阻風雪村落去携杖亦到龍馬溪茆屋沽村釀玉虛
悔不至實爲舟人誑聞道石最奇寤寐見怪狀峽山
富奇偉得一知幾喪苦恨不知名歷歷但想像今朝
脫重險楚水渺平蕩魚多客庖足風順行意王追思
偶成篇聊助舟人唱鄧諫從題巫山瞻華亭云峻崢
玉削三千丈翠潑嵐光冷相向風含太古雲氣長變
化溟濛紛萬象陰晴一日具四時天籟壑深虛自響
神山娟妙擢羣參錦繡鋪張獻奇狀蟠根積鐵匯百
川龍矯蛟翻饒跌宕勢連三楚此開國故壘荒宮帶
溪瀆樓臺井邑老風烟環珮清聞駐仙仗竹林風味

便讀易久與江山爲輩行鳴絃餘暇豁心眼戲著飛
欄雲雨上爽明自可達壅蔽野獲又何勞草創政和
民氣長似春景迥心平過於掌征鴻明滅志何杳黃
鵠追隨意尤放當年李杜經行處太史銀鉤刻青嶂
寶刀珠瑟出耕墾曲水纖腰迷草莽牢盆古隸雜秦
篆飛動問摹永平樣珊瑚交柯迥不蝕髣髴將軍勳
業壯英雄繁盛隨流水時有竹枝賡牧唱孔泉文物
起騷經國色明妃守孤尙我家峩眉紫翠間爲愛奇
峰甘菫醬秋風野水憶絲蓴擊汰夷猶理烟榜李塹
離巫山晚泊碑石灘下云黃昏風雨阻江濱翠縮羣

峰暮色勻一夜子規啼到曉孤舟愁殺未歸人

卷之三十二 蜀中名勝記卷之三十二 蜀中曹學佺能始著

蜀中名勝記卷之三十三

蜀中曹學佺能始著

夔州府三

達州

蜀以元微之左遷司馬著名方輿勝覽有勝江亭在州西三里乃郡守王蕃讀白樂天寄微之詩云達州猶似勝江州因以名亭也長慶集微之到通州日授館未安塵壁間有數行字乃是僕十五年前初及第時贈長安妓阿軟絕句緬思往事杳若夢中懷舊感今因作長句呈白居易詩云十五年前似夢遊曾將

蜀中名勝記 卷二十三
詩句結風流昔教紅袖佳人唱今遣青衫司馬愁又
見樂天詩云通州到日日平西江館無人虎印泥忽
向破簷殘漏處見君詩在柱心題其間酬唱甚多未
可殫述 當時有李景信者自長安來訪周旋少日
而別焉微之有李十一景信到詩云何事相逢翻有
淚念君緣我到通州留君贖任君須任我不自由君
自由又有丁溪館別景信詩云東城每與閑人別猶
自傷心欲白頭今日別君心更苦別君緣是在通州
陳昇翠玉軒序通川之境東瀉巴渠西峙鐵嶺南
對憂雲北望鳳山寰宇記云巴渠江在石鼓縣南四

十步流入通州界江中有南昌灘元微之南昌灘詩
云渠江明淨峽逶迤船到名灘拽惹遲櫓寢動搖妨
作夢巴童指點笑吟詩畚餘宿麥黃山腹日背殘花
白水湄物色可憐心莫恨此行都是獨行時 志云
鐵山在州西二十五里色如鐵上有獅子石和尚巖
諸勝蓋迢遞自石城來者山四面絕嵯西有一路登
頂寰宇記云後魏廢帝二年開拓山南改宣漢爲石
城從山名也 輿地紀勝云翠屏山橫列州南元微
之建憂雲亭於上山北又有水流寺巨石刻成殿形
餘址蕪沒唯佛像屹立江邊 寰宇記云鳳凰山在

通川縣北五里山形鳳翅掩映州城有梧桐坪寶芝洞諸勝洞中石乳成峰玲瓏如刻鏤又有砥石縱橫丈餘鑿爲曲道可以流觴志云鳳山有呂公聖相傳呂純陽幻形乞食寺僧知而蹤跡之逐雲影冉冉逝去輿地碑曰漢車騎將軍馮緄碑在永睦縣之西八十里緄薨於桓帝之永康元年文尙瞭然可讀其父煥亦有兩碑斷裂不全僅存大槩又云有漢廣漢蜀國侯李翊及蜀國侯夫人墓銘翊以靈帝熹平二年卒夫人不著姓氏疑其爲臧氏字跡亦多剝缺又云書字薨碑在巴渠縣西十里多斷缺不成文理間

存晉昌太守字按晉孝武方立晉昌郡則此必東晉以後人碑耳又云唐處士墓碑在州城北十五里楊斗壩馬腦鼻山下乃唐景龍二年刻字畫迺媚如歐柳可愛又云元稹告畚三楊神文元和志載在通川縣之華陽觀又云廣福院修佛殿記在永睦縣卽唐福田寺有會昌三年王欽說修佛殿記又云瀘潭院鐫佛記在通川縣東富教里岍側石上乃唐人所鐫傍有中和造像人姓名百餘字多漫滅又有黃山谷贈通川令韓廣叔碑文廣叔赴通川日魯直以言贈之曰惟勤能辦公家惟清能律貪吏嚴而信則吏不

病民簡而敏則民多在野又有趙節婦碑節婦姓趙氏贅居有兇人欲犯之脅以白刃節婦不爲動旣而誘以百端終不可遂刺殺之時皇祐二年知州薛侏表其節爲之立碑于達州之西北山上後邑令薛仲侃剏祠繪像於中

東鄉縣

治南有石鼓橫江上爲石鼓鎮楚春申君之花果園也寰宇記云唐析石鼓縣之西鄉地在東關水北五十步置巴渠縣紀勝云舊巴渠縣後鹿子山漢樊噲嘗屯兵于此四彙述云唐武德中移東鄉縣治於今

縣東一里安養故城 寰宇記云萬戶溪在巴渠縣東八十里自開州萬壽縣界北流來合縣漑江水又有成熟溪亦自開州萬歲縣來合文字溪紀勝云西北四十里崖壁間懸二石左類日右類月月中空隙有娑羅樹一株

太平縣

舊明通縣地也勝覽云丙穴在明通縣井峽中其穴凡十其中皆產嘉魚春社之前魚卽出穴秋社旋歸其出也止于巴渠龍脊灘首有黑點謂照映星象相感而成長身細鱗肉白如玉其味自鹹蓋食鹽泉也

紀勝云太平東七里有龍潭羣峰環拱凡七十二
浦會合凡四十八渚而滙爲潭廣餘百畝其深叵測
寔爲龍湫又云東北八十里萬頃池是春申君故居
旁有平田萬頃鄰邑諸水源皆出于此

新甯縣

寰宇記云故新甯城在縣西北十里後魏恭帝二年
于此立縣隋開皇三年廢唐武德二年又置後遷于
賓城通志云宋更爲三岡縣至道中移治于新安市
元至元初復稱新甯 紀勝云新甯南十里有黃
茅嶺卽古詩所稱猿聲時下斷月色好平看也

梁山縣

邑名高粱又曰都梁皆因山也寰宇記云高粱大山
在縣北四十里尋江源記云高粱山東尾跨江西首
劍閣東西數千里山嶺長峻其峰崔嵬于蜀市望之
若長雲垂天一日行之乃極其頂俯視眾山泯若平
原劍閣銘所謂巖巖梁山積石峩峩者也張文宗蜀
道難詩梁山鎮地險積石阻雲端 輿地紀勝云都
梁又名高都在縣治北十五里舊有高都驛乃天寶
進荔枝之路也山壤腴而黃其民多業種薑 寰宇
記云本漢胸臆地也後魏廢帝分胸臆置魚泉縣今

縣卽魚泉縣地以丙穴嘉魚爲名尋江源記云丙穴有嘉魚其味甚美水出栢枝山在縣東南十五里是也方輿勝覽云五代僞蜀在今軍治置務曰石氏屯田務宋開寶初土豪石處贇納庄田八所遂廢田務移縣于此因陞爲軍劉煥題名序稻田蕃廩常多豐年 紀勝云垂雲樓在子城之北左瞰萬石右倚東山景物竒麗峽中未有又有瑞豐亭陸務觀詩峽中地偏常苦貧政令愈簡民愈淳本來無事只畏擾擾者才吏非庸人都梁之人猶無苦須晴得晴雨得雨父老羅拜豐年賜縱產芝房非上瑞 勝覽云峰

門山在軍東十五里其山高頂有寒泉兩崖對峙如門也 又云蟠龍山在城東二十里孤峙秀傑突出眾山之上下有二洞洞有二石龍狀首尾相蟠故名旁曰噴霧岩洞中之泉下注垂幄約二百餘丈噴薄如霧張無盡留題云水味甘腴偏宜煮茗非陸羽莫能辨范石湖以爲天下瀑布第一有飛練亭與之相對舊取徐凝詩句東坡以爲惡乃易名飛雪亭取歐陽公所稱六月飛雪灑石砭句魏了翁飛雪亭詩云自荆入蜀路險絕黑猿聲中膽欲折萬州江頭舍舟楫又趣擔簦窮岷巖危磴連雲如積鐵亂石砭足

十九跌僕夫流汗馬吐舌遙望蟠龍掛天脇懸瀑落巖噴霏屑中間有亭曰飛雪十里陰風寒人髮人言此地無六月呼取大斗酌甘潔一飲令君消內熱予以壬子歲再過此作詩云春水三年別寒聲十里聞鶯花流出洞樹石掛成文有意同高潔無心作使君前車行度險予且坐斜曛按蟠龍洞古碑云張卞爲蜀將先王攻固陵諫不聽乃入山修真遇樵叟自稱鴟彝人授之丹訣得道去碑目又云舊梁山驛碑在軍東四十里耆舊相傳李唐時有白虎蛟龍爲民害民至遷居以避韓昌黎嘗按部經行二害乃去作

碑識之今名其地爲碑坳碑猶存於溪側字漫滅不可復識又有唐碑題云令長新誠之記乃明皇御製梁山令尹茂元得于萬州守河東裴公而刻之蓋大中十年也嘉定丁卯郡守李錫移于軍治其詞云我求令長保父下民民之不安必有所因侵漁寢廣賦役不均使夫離散莫保其身徵諸善理寄爾良臣與之革故政在維新調風變俗背僞歸真教化爲先惠卹于貧無小無大必躬必親青旌勸農孰不攸遵曷云被之我澤如春此碑原在舊驛中勝覽云書院峽在軍東五十里峽石市之北每風雨冥冥如聞讀

書聲故其中有夫子岷子貢壩峽下有坐卧石塔按夫子子貢韓退之皆未嘗至蜀此必附會之說也

勝覽云寒泉洞在軍之西龍鎮十里許有洞曰寒泉紀勝云軍西二十里赤牛山覺林院之東有一石龕琢石爲大悲像四十二手皆有所執碑目云赤牛城有石刻淳祐二年上元落成週三百六十步敵樓百四十三座四門各有廢刻壇壝將臺各基址猶存紀勝又云縣西五十里多喜山時有神光現見之多獲喜事故名陳希彛曾居此丹爐石枕俱存有雌雄泉春夏左盈右竭秋冬左竭右盈古誌識云東有

飛龍西有赤牛文必拜相武必封侯按飛龍卽蟠龍山赤牛卽牛頭寨也宋張無盡拜相漢張卞至唐時始封廣澤侯紀勝又云金鳳山在軍西五十里楊市之北其山之南半岷有罅邃然內皆洞名其石上有若圖仙女狀面貌儼然時若動搖迫而視之則不見又云軍西七十里落雲潭常有雲覆其上他日漁者拋網得一石老君自此不復有雲氣像在永安市民冉氏園中背有字曰天漢二年刻寰宇記云石瓦山在縣西北一十三里山巔有古人礪刀劍亂石如積瓦焉紀勝云瓦城山在軍西百二十里

圖經亦曰石瓦山山下有古欄楯蹤迹屈曲至于山上其巔平坦耕者往往得古銅片 紀勝又云軍西百四十里筆山卽白雲山也奇峰如筆故云宋張無盡詩白雲山上揖世尊各以願力濟羣生卽此予以萬厯己酉歲登峰上卽別寄題詩云似筆挺然秀山川亦好文岩渠花裏出秦嶺竹間分石臼生春水香龕積暮雲經過難久任日後覺離羣王子歲再過此作詩云霧到此中止分明要客登水田開四野松石閑孤僧步入禪鐘慣詩題綵筆曾稍紆行役苦惟有勝緣能 寰宇記有逢溪山云在縣南八十步水西

南流入忠州桂溪縣界 通川志云浮蘭碑載梁山軍忠州兩界舊有漢刻石署白虎彝王姓名今其上刻漢時官屬及白虎彝王及時民等姓名尙有可攷碑目云五大夫碑在梁山軍界上字雖漫滅然乃漢隸也 夷堅雜錄云梁山有漢武帝祠至今祭時往往有一二百蝴蝶降祠所享其食近之不驚徹饌然後羣去時謂武帝侍從捉之者必致病按常璩云益州刺史毀蜀中山川神祠取其松栢爲舟船惟不毀漢武帝祠則蜀之祠武帝久矣 紀勝云梁山呂保藏家高崕峭絕半腹有一穴漢赤眉之亂邑人呂保

藏家貲巨萬鑿石以居寇不能近後舉家隱焉宋紹熙中有樵夫得一券于岷側非銅非鐵其聲鏘然上有古篆云西漢之末赤眉邂逅黃金千兩坑埋而走羔豚十祭其財自阜今藏所猶存

萬縣

華陽國志巴東郡南浦縣在郡南三百里晉初置主爨又云晉武帝平吳之後巴東省羊渠置南浦按南浦在縣南岷蜀志建安二十一年先主分胸臆之東南界置漢豐縣故其西四里天子城相傳昭烈駐兵于此常璩所云小石城是也三面峭壁惟山後長延一

脊容徑尺許累石爲門

羊渠漢縣也通志云萬

縣西五十里羊飛山相傳有道人令童子牧羊戒使勿放一日童子放之其羊冲天而去按蜀鑑羊飛山下有羊渠縣卽此 縣南百二十里又有廢武甯縣後周建德所立唐王周過武甯縣詩云行過武甯縣初晴物景和岷廻驚水急山淺見天多細草濃藍潑輕烟匹練拖晚來何處宿一笛起漁歌 輿地紀勝云武甯縣西一里許旌陽舊宅卽今之白鶴寺也宋大章未嘗讀神仙傳疑而不信新都宰張澤語之曰許遜本潭人曾任蜀之旌陽令雅顧此山因有別業

亦何疑乎 一統志載萬縣西百里有木樨山昔大禹治水過此見眾山漂沒惟此山木樨不動故名寰宇記云在武甯縣東南十三里山頂有池淺深隨江水漲減以地理合之是矣樂史又云石笋山在縣東北三十五里其狀如笋舟過漕溪灤塗之間見之恫目焉 水經曰江水又東逕灤塗而歷胡灘又東逕界壇註云是地巴東之西界益州之東界也按灤塗驛在萬縣南六十里江中有石似胡人名曰胡灘飛瀑湍流其勢險急杜少陵詩不是怕胡灘者此矣亦今上下川東之界也 經云江水又東 北集渠

註云二溪水涪陵縣界謂之于陽溪北流逕巴東郡之南浦僑縣西溪夾側鹽井三口相去各數十步以木爲桶徑五尺修養不絕水北流注于江謂之南集渠口亦曰于陽溪口北水出新浦縣北高梁山分溪南流逕其縣西又南一百里入胸臆縣南入于江謂之北集渠口別名班口又曰分水口胸臆尉治此按分水驛在萬縣西南八十里此水由天生橋而出方輿勝覽云天生橋在州西苧溪上乃一巨石自然成橋長與溪等平闊如履平地溪流出其下 經云江水又東逕石龍註云水至于博陽二村之間有盤

石廣四百丈長六里而復殆于阻塞江川夏沒冬出
基亘通渚按卽縣西之盤龍磧也江岍中有黃金沱
蛾眉磧古練石皆以形似得名碑曰云隋朝寶像記
在古練岩 陳子昂萬州曉發放舟乘漲還寄蜀
中親朋詩空濛巖雨霽爛熳曉雲歸嘯旅乘明發奔
橈驚斷磯蒼茫林岫轉絡繹漲濤飛遠岍孤烟出遙
峰曙日微前瞻未能駒坐望已相依曲直多今古經
過失是非還期方浩浩征駟日駢駢寄謝干金子江
海事多違王周萬州公居詩公居門館靜旅寄萬州
城山共秋烟紫霜并夜月清無愁干酒律有句入詩

評何必須林下方馳吏隱名劉長卿寄萬州崔使君
今欽詩時艱方用武儒者任浮沈搖落秋汀暮憐君
巴峽深王門多白首蜀郡滿青襟自解書生詠愁猿
莫夜吟鄭谷寄南浦謫官詩多才翻得罪天未抱窮
憂白首爲遷客青山遶萬州醉疑梅嶂曉歌厭竹枝
秋望闕懷鄉淚荆江水共流范成大萬州詩晨炊維
下巖晚酌艤南浦波心照州榜雲脚響衙鼓前山如
屏牆得得正當戶西江朝宗來循屏復東去官曹倚
巖樓市井喚船渡瓦屋仄石磴猿啼鬧人語剔核杏
餘酸連枝茶賸苦窮鄉固瘠薄陋俗亦寒窶營營謀

食艱寂寂懷甄詵昔聞吏隱名今識吏隱處自注云此萬州之寔境非親到者不知其語之工也紀勝云縣西有太白巖在西山上卽絕塵龕也碑曰云絕塵龕三字在西山石壁字體清勁類晉宋間人書有唐人詩刻相傳以太白讀書於此岩下有池宋郡守馬元穎魯有開所鑿廣一畝植以芙蕖荔枝雜果凡三百本有勒封院黃魯直記云庭堅蒙恩東歸道出南浦太守高仲本置酒西山寔與其從事譚處道俱來西山者由郡西渡大壑稍陟山半竹栢蒼翳水泉瀦爲大湖亭榭環之有僧舍五區其都名曰勒封院

樓觀重複出沒烟霏之間而光影在水邦之人歲修禊事於此凡夔州一道東望巫峽西盡郿林泉之勝莫與南浦爭長者也寺僧文照喜事作東西二堂于茂林修竹之間仲本以爲不奢不陋冬燠而夏涼宜于遊觀也建中靖國元年二月辛酉江西黃魯直題張俞宴萬州西山池亭東魯使君詩西嶺鬱盤結寒泉注原隰下有乘龍池何年此殊極復爲龜鼉據亂我清泉色松幹已交摧石牙空鬪立魯侯獨窮勝無事日尋陟蕩滌潢汙流宛如疏鑿力池光復涵澈萬象皆鏡入亭觀出浮雲彤彤映拜域左右浮屠宮

巋然爭巖岌昔乃荆棘荒今爲蕙蘭襲密樹低華陰
嘉禽弄文翼使君池上宴何減襄陽習又題西山臨
江亭詩南浦逢除日天涯有去舟蠻城和雨閉峽水
帶春流不負新年感惟多故國愁甯無賀春酒徒此
事羈囚 勝覽云岑公洞在大江之南廣六十餘丈
深四十餘丈石岩盤結如華蓋左右方池有泉湧出
巖簷遇盛夏注水如簾松篁藤蘿鬱蔥蒼翠眞神仙
窟也圖經云岑公名道願本陵江人隋末避地隱此
岩下百餘歲肌膚若冰雪積二十年尸解去碑目云
岑先生銘唐嚴挺之撰開元二年立又有段文昌銘

貞元三年四月十五日鐫唐刺史馬冉詩云南溪有
仙澗咫尺非人間泠泠松風下日暮空蒼山宋趙喜
贛詩眞人邈何之恍惚不可見洞居獨嵌空壁溜明
珠濺藤蘿含溟濛竹栢鬪蔥蒨至幽合人心遠翠落
江面野老乘籃輿使君肆清燕日影砌下倒雲容坐
間變大木岩欲傾邃壑路微轉崢嶸施屏風點綴成
彩綉雖云急行樂勝賞殆亦遍欲歸重盤旋拂石看
古篆郭印詩岑公來避世甲子十周年夏屋虛岩豁
神芝結蘂懸木喬從古種香杳至今傳學道能堅忍
何人不得仙宋徽宗政和五年四月二十一日幸徐

常廬因念逾期未歸信筆立成一絕可知常許茲眷
意庶速西上也詩云人生何事厭囂塵泛宅浮家冬
復春今日暫來猿鶴語他年應召白雲人黃庭堅建
中靖國元年三月萬守高仲本宿約遊岑公洞夜雨
達旦戲贈二小詩云肩輿欲到岑公洞正怯衝泥傍
險行應是岑公闕清境春江一夜雨連明又逢窻夜
靜雨如灑恰似槽牀壓酒聲今日岑公不能飲吾儕
強健可頻傾范仲黼詩石壁虛涵雲氣深水簾蔽蔽
墮璆琳客來但愛幽棲好誰識岑公萬古心謝希琨
詩自有烟雲護石扉更闌曉色近清暉岩前老檜吟

風處似請仙翁化鶴歸 碑曰云萬州虛鑒真人贊
朝請大夫知襄州軍事兼管內勸農事提舉房隨郢
州兵馬巡檢公事柱國借紫岑象求撰文陽翟李廌
書丹南京進士戚遠題額奉議郎權知萬州軍事兼
管內勸農事武騎尉賜緋借紫蓋休景立石于元符
元年又云宣和中道君皇帝御書萬州妙庭觀岑洞
碑紹興二十八年二月朝右朝請大夫權發遣萬州
軍并三管學事兼管內勸農借紫臣李莘民述記冲
妙大師前勅差充萬州道正三管教門公事賜紫臣
冉通明立石已上諸碑予以癸丑歲二月歸舟遍訪

而搨之 圖經云峽中漢刻少今萬州報恩寺有碑
高五尺乃漢桓帝延熹間所刻石凡百餘字土人謂
之宜子碑 紀勝云西南三里壽甯觀有唐太宗明
皇銅真像治北集虛觀有唐垂拱時碑 碑目云萬
利廟碑乾德乙丑白廷誨爲刺史重修距今二百三
十餘年漫滅不可讀又云白刺史題名記開寶二年
九月記同時僚佐姓名在州萬利廟有碑仆草莽中
考閱得之字皆漫滅獨白刺史名在 碑目又云大
雲寺碑有唐僧圓澤傳及中和間萬州守李裁書聖
業院碑在周溪大江之濱三生石旁蘇封可見者咸

通三年壬子歲十一月建十餘字耳按周溪在縣東
四十里忠義傳載李源道人再生事詩云三生石上
舊精魂賞月吟風不要論慚愧情人遠相訪此身雖
異性常存又身前身後事茫茫欲話因緣恐斷腸吳
越山川尋已遍却迴烟棹上瞿唐吟齋夜話云此僧
贊甯所記東坡以爲卽圓澤也 經云江水又東彭
水注之註云水出巴渠郡獠中東南流逕漢豐縣東
清水注之水道源出西北巴渠縣東北巴嶺南獠中
卽巴渠水也西南流至其縣又西入峽檀井溪水出
焉又西過山至漢豐縣東而西注彭溪謂之清水口

彭溪又入逕胸臆縣西六十里南流至于江謂之彭溪口按在縣東八十里巴陽驛是俗名小江舊小彭驛設焉紀勝云小彭驛邊有二石虎高五尺各有四翅石刻詩云巍巍二虎一塵根巨石鑄成尙有痕只此也須防夜前灞陵恐遇李將軍蓋驛尉題俗稱石麒麟云

雲陽縣

經云江水又東右逕胸臆縣故城南註引常璩曰縣在巴東郡西二百九十里縣治故城跨其山阪南臨大江之南岍有方山山形方峭枕側江濱輿地紀

勝胸臆城本漢縣在萬戶城西固陵集載李燾胸臆記云余泊舟雲安之西三十里萬戶驛下橫石灘上土人云今驛之左右則胸臆故城也仁父又有曲水留題云或言雲安之西三十里許有自然曲水閏月甲午朔泊舟橫石灘上攜子屋至塾壁壘及劉甥卞子道子步訪之水極浚急不可流觴岩巔有永和三年及六年刻字十五六行剝落已不可讀細辨其文但昔人捐金以事仙佛識金數于石耳殆非禊飲處也好事者因年號遂增飾之當時必置房廬像設今變滅無餘然水石要可喜取酒酌其旁賞晤良久

乃去輿地碑曰云夔州守楊輔去官過萬戶驛故胸
臆縣治泊舟游古書岩見刻石滿其上意當時或有
像設屋室蓋縣人常所往來之地縣徒歲月不復可
考而石刻亦漫闕就盡說者但爲臆創乃屬雲安大
夫劉申徧摹岩上下石刻試考詳之庶幾其猶有獲
也同來者雲安大夫鄭邦基郝奚仲從姪有聲淳熙
十五年八月十六日按橫石灘今之橫梁候館設焉
萬戶驛卽萬戶壩去縣西四十里 萬戶驛北有漢
城山乃漢扶嘉所居按扶嘉胸臆人也初嘉母于湯
溪側遇龍後生嘉巧發竒中高祖爲漢王與嘉相遇

獻定三秦策高祖以其志在扶翊賜姓扶氏爲廷尉
臨終有言云三牛對馬嶺不出貴人出鹽井按馬嶺
在縣北三十里三牛在縣北二十里皆近鹽井監

經云江水又逕魚復縣之故陵註云舊郡治故陵
溪西二里之故陵村溪卽永谷也地多木瓜樹有子
大如鯁白黃實甚芬香爾雅之所謂楸也經云江水
又東爲落牛灘逕故陵北註云江側有六大墳庾仲
雍曰楚都丹陽所葬亦猶枳之巴陵矣故以故陵爲
名也有魚復戍戍此江之左岨有巴鄉村村人善釀
故俗稱巴鄉清郡出名酒村側有溪溪中多靈壽木

中有魚其頭似羊豐肉少骨美于餘魚溪水伏流逕平頭山內通南浦故縣陂湖其地平曠有湖澤中有菱芡鰱鴈不異外江凡此等物入峽所無按故陵者卽古陵沱也酈道元以爲舊郡治今名舊縣壩碑目云漢處士金廣延母子碑初無文字但有人物又有一碑所勒皆車馬人物或云古者修車馬備器械之圖此皆在舊雲安郡寰宇記云使君灘在軍東二里大江中昔楊亮爲益州至此舟覆徵其波瀾蜀人至今猶名之爲使君灘一日博望灘荊州記云張騫奉使西域于此覆舟亦名使君灘乃在今縣之

西江中又有龍脊灘形如遊龍每歲邑人遊於灘上以雞子卜歲豐凶古謠云龍床如拭濟舟必吉龍床彷彿濟舟必沒宋馮時行龍脊灘留題云建炎戊申正月上巳日判官李造道司戶趙執權知縣母丘元望縣尉馮當可陪郡侯謁武烈公祠遂泛江而下散步此磧老杜詩云元日至人日未有不陰時議者謂天寶之季此詩盡之今日天宇清明江國熙然太平之期指日可俟又獲與諸公偕遊所謂人日也馮當可書杜詩東城抱春岑江閣鄰石面崔嵬晨雲白朝旭射芳甸唐詩有峽斷見孤邑江流照飛夢

暮色四山起愁斷數猿聲皆雲安景象元和志郡有鹽官橋官今五峰驛前有橋官堂宋李重雲安橋官堂記云建炎中改軍爲縣隸于夔猶存使名官儀仍備太守之畧而時節得以奏章自達于朝他邑莫比焉治內有杜鵑亭杜詩雲安有杜鵑名本于此杜詩又曰峽裏雲安縣江樓翼瓦齊兩邊山木合終日子規啼按杜鵑子規本一鳥蜀本紀以爲望帝所化詳在方物志予過雲陽題杜鵑亭詩云春林血淚染山青羈客中宵忍淚聽何處蜀山不啼遍雲安偏有杜鵑亭又過雲安絕句之三云也是山青水碧時

客懷何事動深悲春秋三月無行迹君未前來聽子規葢兩用之方輿勝覽云飛鳳山與縣治相對古刻鳳凰岩三字瀑布泉出焉注于白玉池產太乙元精石按張桓侯祠設在此山之脊馮當可所稱武烈祠也有石如杵黝而澤設在案前卽元精石經云江水又逕東陽灘註云江上有破石故亦通謂破石灘荀延光沒處也常璩曰水道有東陽下瞿數灘山有大小石城靈壽木卽橘圃也水經註曰江水過下瞿灘左則湯溪水注之水源出縣北六百餘里上庸界南流歷縣翼帶鹽井一百所巴川資以自給粒

大者方寸中央隆起形如張傘故因名之曰傘子鹽
有不成者形亦必方異于常鹽王隱晉書地道記曰
入湯口四十三里有石煮以爲鹽大者如升小者如
拳煮之水竭鹽成蓋蜀火井之倫水火相得乃佳耳
湯溪下與檀溪水合上承巴渠水巴渠南歷檀井溪
檀井入湯水湯水又南入于江名曰湯口也 唐商
眞君飛昇記云雲安風俗淳厚陶染眞風如瞿法言
楊雲外之徒繼出故琳宮秘館獨盛他處輿地紀勝
云棲霞觀舊名昇雲宮在縣北一十里宮據山絕頂
下瞰羣峰培塿可數唐瞿法言于此修煉白日仙去

巨栢參天皆二仙手植殿左有五龍池能興雲致雨
碑曰云唐雲外尊師碑在雲昇宮杜光庭撰見九域
志今名棲霞宮又曰縣西四十里集靈觀有碑云象
山福地玉華仙館唐商眞君飛昇之所 又曰縣西
百里有上下岩黃魯直云唐末有劉道者聞道于雲
居膺禪師爲開岩第一祖法號道微自鑿石龕曰虎
便藏龕中不用日時門人奉其命二百年來遊者題
詩不可勝讀莫能起此開岩者故予作詩表見之云
空岩靜發鐘磬響古木倒掛藤蘿昏莫道蒼苔鎖靈
骨時應持鉢到諸村又云寺古松楠老巖虛塔廟閑

僧緣蠶麥去官數荔枝來石室無心骨金鋪稱意苔
若爲劉道者拽得鼻頭回自注云其一用楊子安韻
一用王定國韻也按下巖卽燕子龕見郭信可詩
王維贈燕子龕禪師云山中燕子龕路劇羊腸惡裂
地競盤屈挿天多峭嶒瀑泉吼而噴怪石看欲落伯
禹訪未知五丁愁不鑿上人無生緣生長居紫閣六
時自撻磬一飲尙帶索種田燒白雲斫漆響丹壑行
隨拾栗猿歸對巢松鶴時許山神請偶逢洞仙博救
世多慈悲卽心無行作周商倦積阻蜀物多淹泊巖
腹乍旁穿澗唇時外拓橋因倒樹架柵值垂藤縛鳥

道悉已平龍宮爲之涸跳波誰揭厲絕壁免捫摸山
木日陰陰結跏歸舊林一向石門裏任君春草深郭
印題雲安下岩云地涉雲安境山名燕子龕簾垂看
急溜蓋偃得修楠牢落前賢蹟光明古佛菴幽禽知
客至一一解元談趙抃過雲安軍下巖僧舍云幽寺
倚巖阿雲扉掩薜蘿老僧中燕息誰問世風波喻汝
礪雲安下巖次涪翁韻云徑向山腰轉門從水面開
片雲巖下宿一鉢朔方來落日鳥衝樹輕陰花覆苔
惟應荔枝熟時躡白雲回又路暗松杉密天空霧雨
開山容依檻轉鳥影渡江來汲水僧歸寺銜花鹿印

蜀中名勝記 卷二十三 三
苔年年蠶麥熟貧道啜齋回宋肇題下巖云古寺依
叢壑雲深暗薜蘿山僧眉曉異林鳥語聲和絕壁疑
無路長江忽自波暫來還趣駕衰早倦經過又下巖
逢雨云地險重樓仄巖虛古殿開泉鳴風處瀨石暗
雨邊苔黃葉曾攀柳青梢未折梅居僧因解笈歲晚
尙西來又嵐光分碧瓦江影動丹扉林鳥拳晴竹沙
鷗印夕霏風幡空自舞雲岫幾時歸石室君無問塵
埃萬事非又盡把蕭疎鬢難勝浩蕩愁西風吹落日
小雨弄殘秋湮沒千山瘴掀騰萬壑流宦途如客路
吾意轉悠悠黃人傑題云十月水痕瘦維舟過下巖

鷗行沙作路龍像石爲龕風定烟光合霜回日色酣
賦詩無好語聊用志瞿曇李燾和黃豫章韻云山與
蜀江重巖從天漢開禪僧若個住詩客幾人來金闕
掛白練石龕封綠苔攜家便堪隱歸櫂重徘徊宋永
孚詩云江漲桃花後風薰荔子前來瞻千億佛去此
十三年巖溜翠常滴林花紅欲然因知山與石本性
亦虛圓又兩山中斷曉天開萬頃無波浸綠酷巖外
水簾垂到地坐看烟雨過江來楊邁下巖詩云竹樹
藤蘿密復疎路迴岨斷見精廬龕藏衲子千年骨神
護涪翁半壁書落日紅光浮戶牖曉雲空翠滴衣裾

塵勞獨愧山僧靜一飯跏趺不願餘又下巖避暑云
古寺重來興轉添舟中午暑正炎炎野僧引客登山
閣稚子穿雲放水簾熱得清涼身暫健懶便閑靜意
難厭人間劫火方撩亂法雨何如爲普沾令狐慶譽
詩云地遠塵寰不染埃懸崖屈曲寄層臺山頭玉溜
隨簷滴巖下金容就石開寺影不妨流水過松香常
逐好風來徧遊未盡無窮景爲報舟人且莫催杜東
之詩云濤江翻雪捲胡灘晚泊巖扉暫解顏夙有靜
緣逢寺喜老無生理伴僧閑殘雲已斷獨飛雨落日
將沉却照山半夜秋聲驚客夢一簾珠貝冷珊珊閩

人朱煥下巖次韻云勝地都無一點埃翛翛野竹映
樓臺僧同巢鳥林端見佛顯靈光石面開道者已隨
鸞鶴去世人特爲水雲來登臨清興無窮盡一下層
巒暮色催 予以萬曆壬子暮春過此作詩云病中
入寺情相得雨後看山興轉添片石僧寮無結構一
春巖溜自垂簾題名刻像成今古背路臨江恰見潛
我已忘機來此地白雲溪鳥莫猜嫌因遍訪諸石刻
其可見者游仲馮游季祥來遊時段謙仲適尉此邑
邂逅嵯中酌酒共坐而去淳熙乙巳四月十四日也
軍守張吉監井史澤判官陳奭以嘉祐六年五月

二十一日至寺下遇新蓬州司理向宣顏偕遊 資
 郡張良能少穎解褐西泝艤舟來謁尊者拜三先生
 遺像紹定庚寅仲春念一日男遠卿侍 杜世東就
 銓西歸謾書絕句往年題桂記行色今日支筇還獨
 來道者相看定相笑若為牽得鼻頭回 樂温 缺鐘
 涪陵尉鄭階平治平乙未六月五日同遊任持本院
 主僧法能刻石

開縣

舊漢豐縣也華陽國志云漢豐縣建安二十一年置
 在巴東郡西北彭溪源寰宇記云後周改漢豐縣為

永甯縣今州西四十九里濁水故城是也志云縣南
 四十里墊江一名濁水源出梁山縣之高梁山春夏
 泛漲人多墊溺流至渠口鋪入開江又云清水源出
 萬歲縣之石塔山西南流經石門山又西南流經巴
 渠故城東輿地紀勝云巴渠縣劉宋所置宇文氏改
 為萬歲縣以縣北有萬歲谷也舊址在今縣東北五
 十里即宋之清水縣矣 縣西北一里有盛山以唐
 刺史韋處厚著名韓愈作盛山十二詩序云韋侯昔
 以考功副郎守盛山人謂韋侯美士考功顯曹盛山
 僻郡奪所宜處納之惡地以枉其才韋侯將怨且不

釋矣或曰不然得利則躍躍以喜不得利則戚戚以泣若不可生者豈韋侯之謂哉韋侯讀六藝之文以探周公孔子之意又妙能爲辭章可謂儒者夫儒者之于患難苟非其自取之其拒而不受于懷也若築河隄以障屋雷其容而消之也若水之于海冰之于夏日其翫而忘之以文辭也若奏金石以破蟋蟀之鳴蟲飛之聲况一不快于考功盛山一出入息之間哉未幾果有以韋侯十二詩遺余者方且以入溪谷上巖石逐追雲月不足日爲事讀而詠歌之令人欲棄百事往而與之遊不知其出于巴東以屬胸臆也

于時應而和者凡十人及此年韋侯爲中書舍人侍講六經禁中侯名處厚和者通州元司馬名稹爲宰相洋州許使君名康佐爲京兆忠州白使君居易爲中書舍人李使君景險爲諫議大夫黔府嚴中丞武爲秘書少監溫司馬造爲起居舍人皆集闕下于是盛山十二詩與其和者大行于時聯爲大卷家有之焉慕而爲者將日益多則分爲別卷韋侯俾余題其首云 韋處厚詩激曲縈飛箭浮溝泛漏卮將來山太守莫向習家池右流杯渠不資冬日秀爲作暑天寒先集誠非鳳來翔定是鸞右竹巖巉巖雪中嶠磊

蜀中名勝記 卷二十三
落標方峭勿謂枕蒼山還當礎清廟右繡衣石榻註
爲溫侍御置雨合飛危砌天開卷曉窗薺平聯郭柳
帶繞抱城江右宿雲亭夾岍凝輕素交枝漾淺淪味
調方薦實臘近又先春右梅谿噴日舒紅錦通蹊茂
綠陰終期王母摘不羨武陵深右桃塢疏鑿徒爲巧
圓窪自可澄倒花紛錯繡鑑月靜涵冰右葫蘆沼顧
渚吳商絕蒙山蜀信稀千叢因此始含霧紫英肥右
茶嶺繚繞緣雲上璘玢瓚玉聯高高層幾折極目瞰
秋鳶右盤石磴褊地堆層疊因厓遂削成淺深嵐嶂
色盡向此中呈右琵琶臺縵汲豈無井顛崖愧深浚

願灑塵垢餘一雨根莖潤右上士瓶泉註爲柳律師
置初映鉤如綫終銜鏡似鉤遠澄秋水色高倚曉河
流右隱月岫張籍和云獨入千竿裏緣巖踏石層笋
頭齊欲出更不許人登右竹巖曲沼春流滿新蒲映
野鵝聞齋朝飯後拄杖繞行多右葫蘆沼月出深峰
裏清涼夏亦寒每嫌西落疾不得到明看右隱月岫
臺上綠蘿春閑登不見人每當休暇日着履戴玄巾
右琵琶臺清淨當深處虛明向遠開捲簾無俗客應
只見雲來右宿雲亭自愛新梅好行尋一徑斜不教
人掃石恐損落來花右梅谿山城無別味藥草兼魚

果時有繡衣人同來石上坐右繡衣石榻紫芽連白
藥初向嶺頭生自看家人摘尋常觸露行右茶嶺階
上一眼泉四邊青石甃惟有護淨僧添瓶將盥漱右
上士瓶泉綠酒盈白杯隨流去復回似知人把處各
向面前來右流杯渠累石盤空遠層層勢不危不知
行幾曲得到上頭時右盤石磴春塢桃花發多將野
客遊日西殊未散看望酒釭頭右桃塢 此方洞壑
聯屬而温湯洞爲最杜光庭錄異記云開州後倚盛
山東枕清水沂江而北三十餘里至温湯井井有温
泉在北山上麟德間因雷雨震霹山脚摧裂洞門自

開當門有石鐘自然成形如數千斤鐘大懸身去地
二尺許外象鐘而中實扣之無聲門兩壁有石如金
剛力士之形者數人鐘旁有小徑高六尺已來行二
三丈稍闊有石碑巨龜負之自然而成但無文字而
已碑側有石屏上與頂相連下有一穴側身可入一
二尺許自是廣闊中有路徑平坦與常無異路之左
右滴乳爲石羅列衆形龍鱗鸞鶴頰雲巍山如林如
柱似動似躍乍飛乍顧千形萬態不可殫紀僅一里
許傍竦蓮臺周迴數步高三四丈層綴重疊皆可攀
躋旋生石乳如臂如指者以燭照之通透瑩徹隨折

脆斷及出洞門外得風皆爲白石矣自臺側三四十步有蓮花羅布於地旁有甘泉水色溫白遊洞者烹茗于此前有橫溪湍波甚急其聲喧洶流出洞外溪上有橋長二三丈闊一丈許非石非土功甚宏壯過橋得黃土坡高四五丈道徑險滑行者累息方至其頂坡上有巨堂四壁平淨中高數丈壁上皆有遊山之人題記年月堂之極處曲角有一穴高四五尺廣三四尺去下丈餘躋攀莫及相傳云昔有遊人攀緣而入累月之後出于巫山洞中自後無復敢入者

大甯縣

水經註巫溪水又逕北井縣西東轉歷其縣北井南有鹽井井在縣北故縣名北井建平一郡之所資也鹽水不通巫溪溪水是兼鹽水之稱矣勝覽云寶山在大甯監北十七里半山有穴如瀑泉卽鹹泉也山有牡丹芍藥蘭蕙雜花卉圖經云一泉之利足以奔走四方者此矣知監正子申大甯志序云一溪前陳可濯可泐眾峰纔絕如削如畫亦峽郡之桃源也紀勝云觀音巖在監治東鳳凰山郡守張孝芳愛其類湘中山水暇日窮討得月窟雲巖釣雪玉環浮玉寶華之勝又云距城二里兩江合處中有石岩峙

如門高二三丈溪流噴如瀑布謂之南淵鹽官孔嗣宗春日與客泛舟飲于綠陰下商民鼓吹隨之其樂不減于蠶市矣 志云二仙洞去鹽場二里一名王子洞山高百餘丈上下皆削壁惟一徑寬二尺長四五丈許始達中可丈許凡遊者不敢下視洞口寬高十餘丈深不可測岩上石文生成千字水出石笋四時不絕相傳昔有王子採樵見二人圍棋于此局未終而斧柯已爛其人仰壁留題而去詩曰仙人洞裏無春秋白雲深處心悠悠爛柯樵子半途客安得乘風駕玉蚪千年勝事今朝說一一重重心練結從來

流水與高山更有清風共明月王子後不知所終但傳蛻仙骨長丈餘 碑目丁晉公謂夔州移城記云開寶伐蜀師分劔巫而入時灑灑激射樓船戰艦難進易退步騎自襄州西山裏糧兼行林麓無際澗壑相接不知道路之所從得蜀民詣王師獻書由大甯路直取夔州平蜀之師實取道于此也景德三年記

大昌縣

水經註云巫溪水源出宣漢縣南逕建平郡之秦昌縣南卽大昌也 寰宇記云千頃池在縣西三百六十里波瀾浩渺莫知涯際分爲三道一道東流當縣

爲井源一道西流爲雲安縣陽溪一道南流爲奉節縣西瀼水 杜甫西閣三度期大昌嚴明府同宿不到詩云問子能來宿今疑索故要匣琴虛夜夜手板自朝朝金吼霜鐘徹花催蠟炬銷早鳧江檻底雙影謾飄颻

建始縣

三國時屬吳之建平郡隋開皇爲業州今縣東三十里有州基山是其處 黃山谷馬山口號呈建始李令云驛亭新似眼波明箐路開如掌樣平誰與長官歌美政風搖松竹是歡聲志云縣西三里有石通

洞壁刻涪翁二字蓋山谷曾來遊也 志又云縣西五十里石乳山山石層疊多生石乳其上置石乳閣

蜀中名勝卷二十三終

卷中名勝記

卷二十一

三

五十里	其土置
研	其
...	...

